

**Innarluutillit angajoqqaami nunaqarfiisa avataanut inissinneqarsimatillugu, angajoqqaat atugaanut pitsanngorsaaniissamut sunik periarfissaqarnerseq pillugu apeqquteqaat aallaavigalugu oqallinnissamik siunnersuut?**

(Inatsisartuni ilaasortaq Laura Táunâjik, Siumut)

**Akissuteqaat**

(Isumagininnermut, Ilaqutariinnut, Naligiissitaanermut Inatsisinillu Atuutsitsinermut Naalackersuisoq)

Naalackersuisut apeqquteqaat aallaavigalugu oqallittoqarnissaanik siunnersuummut qujapput.

Suliniutinik inunnut innarluutilinnut pisinnaatitaaffinnik siuarsaaqataasinnaasunik illersuisinnaasunillu kiisalu inunnut innarluutilinnut suliatigut ilisimasaqalernerunissamut iluaqutaasinnaasunik aallartitsisoqarnissaa Naalackersuisut pingaartitarilluinnarpaat. Naalackersuisuttaaq siunnersuuteqartumut isumaqataasorujussuupput, tassami pineqartumut tunngatillugu angajoqqaat inunnik innarluutilinnik qitornallit atugarisaasa malunnaatilimmik pitsanngorsaaffiginissaat pisariaqarmat.

Taamaalillutalu Naalagaaffiit Peqatigiit Meeqqat pillugit Isumaqatigiissutaat malillugu meeqqap angajoqqaani najunngippagit nammineq angajoqqaaminut inuttut toqqaannartumillu attaveqartuarnissaata ataqqinissaa pisussaaffigaarput. Taamatuttaaq angajoqqaanut ilitsersuut meeqqap pisinnaasaanut inerikkiartornissaanullu tulluarnerpaaq ataqqissallugu meeqqamut pingaaruteqarpoq.

Ulloq unnuarlu angerlarsimaffiit anguniagassatut nassuiaataanni angajoqqaanik suleqateqarnissamut tunngasumik immikkoortumik ilanngussisoqarpoq, tassanilu angerlarsimaffiit angajoqqaatut oqartussaassuseqartunut attaveqarnertik ingerlatiinnassallugu pisussaaffeqarput. Ulloq unnuarlu angerlarsimaffiit Namminersorlutik Oqartussanit pigineqartut amerlanersaat massakkut Skype-mik ikkussiffigineqarnikuupput, taannalu ilaatigut angajoqqaanik attaveqartuarnissaq anguniarlugu atorneqartarpoq. Suli qarasaasiakkut pitsaanagerusumik attaveqarsinnaanerup pitsaanagerulernissaa siunertaralugu Namminersorlutik Oqartussat angerlarsimaffiutaanni tamani Skype-business-imik ikkussuisoqarnissaa sulissutigineqarpoq.

Naalackersuisut inunnut innarluutilinnut suliassaqarfimmi kifartuussinerup ataatsimut qaffasinnerunissaa anguniarlugu sulissuteqarput, suliniutinillu arlalinnik aallartitsisimallutik.

Naalackersuisut massakkut Inatsisartut ataatsimiinneranni Inuit Innarluutillit Illersuisuat pillugu Inatsisartut inatsisissaattut siunnersuummik saqqummiisimapput. Inatsisissatut siunnersuummi anguniarneqarpoq inunnut innarluutilinnut pisinnaatitaaffiit siuarsarneqarlutillu qulakkeerseqassat, inunnullu innarluutilinnut inuiaqatigiinni

atugassarititaasut pillugit paasissutissiisoqassalluni. Tamakku saniasigut Inunnut Innarluutilinnut Illersuisoq inunnut innarluutilinnut, suliniaqatigiiffinnut kiisalu inuinnarnut pisinnaatitaaffiit naammagittaalliorsinnaanerlu pillugit siunnersuillunilu ilitersuisartussaassaaq.

Ukiamut Sisimiuni Nuna tamakkerlugu Inunnut Innarluutilinnut Sullissivik ammarneqassaaq. Inunnut Innarluutilinnut Sullissivik suleqatigisanut attuumassutilinnut suliat tungaasigut siunnersuillunilu ilitersuisassaaq. Nuna tamakkerlugu Inunnut Innarluutilinnut Sullissivik ilaatigut inunnut innarluutilinnut tunngatillugu ikiorsiisarneq pillugu ilisimasalik katersuiffiusassaaq, inunnullu innarluutilinnut tunngatillugu ikiorsiinissamut periarfissat pillugit kommuninut, inunnut innarluutilinnut minnerunngitsumillu qanigisaasunut pikkorissartitsisarnissanik neqeroorfiusassalluni. Taamaalillunilu Nuna tamakkerlugu Inunnut Innarluutilinnut Sullissivik Kalaallit Nunaanni inunnut innarluutilinnut tamanut suliatigut ilisimasaqarnerup annerulernissaanut tunngaviliissaaq, taamaalillunilu inunnut innarluutilinnut atugassarititat iluarnerusut qulakkiissallugit. Taamatut suliniuteqartoqarnera aqutugalugu angajoqqaat inunnik innarluutilinnik qitornallit aamma atugassarititatigut ikiorneqassapput, tassami qanigisaasunut pikkorissartitsinerit siunnersuinerillu neqeroorutaassammata aamma. Suliniutigineqartoq suliassaqarfimmi nutaanik isumaliortoqarnissaanik Naalakkersuisut kissaateqarnerannut ilaasutut isigineqassaartaaq. Sumiiffinni qanittuniittuni pinaveersaartitsisarnernut pikkorinnerulertariaqarpugut, taamaalillutami ilaqutariit qanigisallu qimallugit angerlarsimaffinnut inissiisarnerit ikilisarsinnaagatsigit.

Naalakkersuisut ukiaaru ataatsimiinnissami inunnut innarluutilinnut ikiorsiisarneq pillugu inatsisissatut siunnersuummik saqqummiinarput. Sulineq Naalagaaffiit Peqatigiit inunnut innarluutilinnut pisinnaatitaaffiit pillugit isumaqatigiissutaannik aamma inatsisissami nutaami inunnut innarluutilinnut pisinnaatitaaffiit amerlanerit qulakkeerneqarnissaannut tunngasunik aallaaveqarpoq. Naalakkersuisut ilisimavaat meeqqamut innarluutilimmut angajoqqaajuneq unamminartuusinnaammat, apeqqutaananilu meeraq paaqqinnittarfimmiinnersoq angerlarsimaffimmiinnersorluunniit. Taamaammallu inatsisilerinermut tunngatillugu aamma eqqarsaataavoq qanoq iliorluni angajoqqaanut inummik innarluutilimmik qitornalinnut attaveqarniarnerit pitsanngortinneqarsinnaanersut, soorlu tikeraartarsinnaanerit aamma qitornamik nammineq angerlarsimaffimmi paarisqaarnermi akissarsiaqartitsisinnaanermut tunngatillugu.

Inuit innarluutillit, taakkualu qanigisaasa atugarisamikkut sutigut pitsanngorsaaffigisinnaanerit ukkatarissallugu, aningaasaliissutillu tamarmiusut tulleriarneqarnerini ilaatinneqarnissaat pingaaruteqarpoq. Naalakkersuisut sinnerlugit oqallittoqarluarnissaa kissaatigaara, partiillu ilanngussaat qilanaaralugu.